

E escudo cu ta un di e prome simbolonan nacional di Aruba

ORANJESTAD (AAN): Comision Celebracion Dianan Nacional (CCDN) bou auspicio di Ministerio di Cultura ta uni cu Departamento di Cultura Aruba (DCA) cu tin den su puntonan di prioridad, educacion di arte y cultura di nos cultura Arubano. E seis simbolo nacional ta, e Escudo, Himno, Bandera, Idioma Papiamento, Moneda y e Shoco, nan tur ta simbolisa nos identidad como pais Aruba.

E prome simbolo nacional ta nos Escudo: Den corant di 27 di maart 1953 Gobierno a anuncia un concurso pa yegana e escudo di Aruba. Despues 'Atelier voor Heraldische Kunsten' di Amsterdam, Hulanda a

haya e tarea pa crea un diseño basico pa e Escudo. Dia 15 di November 1955, Gobierno di Teritorio Insular di Aruba a aproba nos escudo oficialmente. Un escudo di un pueblo ta un simbolo di diferente aspecto tipi-

co di e pueblo.

Nos Escudo ta simbolisa lo siguiente. Den e prome hoki tin e mata di Aloë. E mata di Aloë ta simbolo di nos prome fuente di ingreso, e industria di Aloë.

Den e di dos hoki: E

sero di Hooiberg. Esaki ta simbolisa nos isla cu a sali for di lama. E color berde ta e color di alegria cu nos ta sinti desde nos autodeterminacion y e liñanan manera ola ta simbolisa nos lama.

Den e di tres hoki: Dunaemento di man. E dunaemento di man aki ta simbolisa e lasonan di Amistad entre nos pueblo y otro nacion, riba terreno politico, economico y cultural. E color cora ta nifica nos caracter generoso, nos simpleza y balor di trabao pa reforsa e lasonan aki.

Den e di cuater hoki: E wiel cu ta simbolisa un timon cu ta duna guia na nos industria, cu ta e fuente di bida mas importante di nos isla. E

cruz meymey di escudo ta simbolo di debocion y fe. E leon cora riba e escudo ta simbolisa forza y generosidad. E ramanan di laurel parti abou di escudo ta e simbolo di paz y Amistad.

Siña conoce nos simbolonan nacional y laga nos muchanan y hubentud cera conoci cu nan, pa hunto como un solo pueblo nos sinti nos mes orguyoso di ta Arubiano.

Ministerio di Cultura conhuntamente cu Departamento di Cultura Aruba (DCA) y Comision Celebracion Dianan Nacional (CCDN) ta spera di por a comparti un tiki informacion tocante nos simbolonan nacional cuminsando cu nos Escudo di Aruba

